

# JEMS

## Jems Riita Keyir Jey Maji

<sup>1</sup> Ada Jems, God riiti, Kraist riiti yo otii tawa wakasa. Ada eyey 12 Isrel mamu eyey nosapek tawey, ada eena woshiato.

### *OTII OTII HECHAWA BOBOY SII NONA KIY-ATAYETO*

<sup>2</sup> Eeji yaka kumwoy kwota na hiki ta otii otii hechawa boboy siita kwotak yataney, eena kwoya hiki ta. <sup>3</sup> Kwo eecha hikitu otii otii hechawa boboy siita kwotak yaney, kwoti hiki siitiichichawa boboy sii eeta boboy siitak dagiir poyenak, kwota keena hapaga siichi eechaba si-ititakiita. <sup>4</sup> Kwo eecha tanak, na eechaba eechaba hiki siitiichichanak, yo otii hama ta. Wonyak, kwo eeka hadabas kepi wey siinak, kwo boboyen dopokasakech.

### *MA NAGWA NAGWA HIKI TAWA BOBOYEN ESIINANAY, II NA GOD RIINA WOHECHO*

<sup>5</sup> Ma por rii kwoti nediik tawey, nagwa nagwa hokwa sokwa nobo esiinaney, rii sa God riina wohe. Wohenyak, eeta nokwapa nokwapa boboyen sobo yeyada ha tawa God riipa riina sobo hakiita. <sup>6</sup> Wowak, kwota wohechanak, na hiki siitiichicha: God riipa hakiita. Opoche i hiki ya hiki tanakech. Eeta ma rii eecha hiki taney, rii sowa ya tawak, uku boro sokwa tawak i ya yatawaga eecha hiki tawey. <sup>7</sup> Eeta yikadey ma rii opoche eecha hikitanakech God riipa riina

boboy pochi hakiita. <sup>8</sup> Yaho. Eeta ma riiti inyaka sii he hiki haka hiki tawak, rii podat noboban hikikasakech.

*KIIRIISIIPOSII TAWA MA, BOBOY SAGA NOKWAPA NOKWAPA TAWA MA MAJI*

<sup>9</sup> God riita kiiriisiiposii tawa ma yenya yesokwa yichinak, yecha sa kwoya hiki ta. <sup>10</sup> Wowak, God riita boboy saga nokwapa nokwapa tawa man otii lagiir poyenak, yecha sa kwoya hiki ba ta. Komasa boboy saga nokwapa nokwapa tawa ma riipa woheja she sokwachi reekasii tawaga eecha siikiita. <sup>11</sup> Eeta ya siipa sokwa harapa pichanak, woheja reeka siinak, she sakanak, kwoya hechawa boboy siipa eeta hamakiita. Sii eechaba siikiita boboy saga nokwapa tawa ma riipa riiti yon otii tanak, riita hanak, riipa eechaba siikiita.

*MAN OTII OTII HECHAWA BOBOY SIITI MAJI*

<sup>12</sup> Eeta ma por riina otii hechaweyn, riita anabeyichi siitii taney, riita sa kwoya hiki ta. Riita otii otii hechawa boboyen magiirechichaney, God riita riina eechaba eechaba tawa boboyen hakiita. Dii eeta hadabas ya God rii haken wotari, eeta ma ye God riina rukusii tawey. <sup>13</sup> Otii otii hechawa boboy siita yanak, ma por rii nobo kepin heechi iken otiiney, opoche eecha hikitanakech: “God riita ana otii otii hecho.” Yaho. Kapasek boboy sii God riina otii otii hekasakech. God riita man eechaba otii otii hekasakech. <sup>14</sup> Yaho. Ma noti inyaka tawa wagisik hiki tawa boboy siita nona yeechi nobo kapasek ye ichi otii hecho.

<sup>15</sup> Diita kapasek otiiken hiki tawa boboy ii yikapwaga yeechi tawak, kapasek boboyen yimowu tanak, sii sokwachi sii ma otii hato.

<sup>16</sup> Eeji yaka kumwoy siiken kwo opoche diita boboy sii kwona woshepiitanakech. <sup>17</sup> Eyey ha tawa hadabas boboy kepi sii hevenen heechi ya sakato. Eyey howuk tawa winyimayen otiir Apoko rii eena diita boboy heechi tawak ya sakato. Eeta Apoko rii di diireboyekasakech. Rii eecha otiitawak, rii otii ma niyik heechikasakech.

<sup>18</sup> God rii riiti inyaka noboban sumowu tarek, rii maji siikenek rii nona yesokwachir. Rii eecha otiirek, no sokwa riita otiir boboyek mapo ichawa ma siir.

*NOTA NA HEHAR MEEJINAK NA SUMOWU TA*

<sup>19</sup> Eeji yaka kumwoy, diina na makabek heechi. Eyey ma ye sa ameya meeji. Ameya geenyek bakasakech. Ameya inyaka kwotayekasakech.

<sup>20</sup> Ma yechi kwotay tawa inyaka sii God riiti boboy kepin otiikasakech. <sup>21</sup> Kwo eyey otii keha tawa boboyen kapasek hikichi otii tawa boboyen na kayek yeechi rabo. Kwota na mayama God riiti kuruk seechinak, kata maji kepin riita kwoti inyaka wopuk chicharin na ya ta. Diita maji siita kwona yesokwa yichikiita.

<sup>22</sup> Kwo opoche mayama woshepiitanakech. God riiti maji kwo opoche biish meejibanakech. Na meejichiniga otii ta. <sup>23</sup> Eeta ma por rii God riiti majin meejichi sumowunan siiney, rii ma mayi yepen mey tawaga eecha otiito. <sup>24</sup> Rii riiti misoman hechi ichawey, ameya riiti inyaka abosuchichu. <sup>25</sup> Wowak, diita lo kepi sii

ma yenya kapasek boboyek pokoga jichaweyn heemachichawak, eeta kepiwey siito. Ma por riita diita lo siiti mun hehar hiki taney, rii saka wageteyichi abosuchichawak, rii meejichi hehar sumowuney, God riipa eeta ma riiti yon kiy-atayichinyak, riipa kepi siikiita.

<sup>26</sup> Ma kaw rii eeche hiki tawey, “Ada ma kepi. Ada God riiti hin yesokwato.” Diita na meejichi: Riita riiti tarekwoyen hehar otiinan siiney, rii God riiti hin sobo yesokwatawak, rii eeta mayama woshepiito. <sup>27</sup> Apoko God rii eeche hikitu diita yo eeta kepi wey, eeji hin yesokwato: Apoko, nokwapa biish tawa yikapwan heharetawak, mibiya mimaye nomo yataweyn hehareto. Akar boboy diitata: Nota na otii tanak, diita nosapek tawa boboy sii nona otii kwopa siikasakech. Diita yo God riiti hin yesokwato.

## 2

### *NOTA NA EYEY CHEGIIBAK TAWA MAN IN-YAKAPWA HIKI TA*

<sup>1</sup> Eeji yaka kumwoy na meejichi. Kwo Harapa hadabas Jisas Kraist riitaka tawey, riina hiki siitiichiniga chishi tawak, kwo opoche mak ruwu tawa siivatabin hechi inyaka upurusi hikitanakech. <sup>2</sup> Kapo ma por rii siivatabi kepin ruwuchi iyarewey tapa ma golek ruwuchi iyarewey, kiiriisiiposii tawa ma eecheba siivatabi kapaseken ruwuchi iyarebato. <sup>3-4</sup> Kwo siivatabi kepin ruwu tawa man kepi hikichi eeche wonyey, “Diita tiikiir kepik na ya yi,” kwo kiiriisiiposii tawa man kapasek hikichi eeche wonyey, “Miita na siiti ta, miita yiken otiiney, na nosapek he

yi,” kwo eeta kapasek otiito. Kwota eeta yikadey boboy eeche otiiney, ii kwoti yaka kumwoy yechi inyakan kwo saboyeto. Kwo kapasek hikichi anasato.

<sup>5</sup> Eeji yaka kumwoy na meeji. God riita diita nosapek kiiriisiiposii tawa man hisiirek, ye harapa hiki siitiichi God riiti kigdomek i siiken hikitu. God riita riiti hadabas eemen God riina rukusii tawa ma yenya haken wohowur.

<sup>6</sup> Wowak, kwokiiriisiiposii ma yechi hin veenyitu. Nama kwona kikir chishi neekichi anasak ye ichu? Ya manika tawa ma yecha eeche otiito!

<sup>7</sup> God riita kwona hi kepin harek, yecha eeta hin kapasek habato.

<sup>8</sup> Diita lo siin noti Harapa aka tabo yima riita eeche wor: “Miita mayama rukusii tawabaga miitaka bana bana tawa man na eecheba rukusiiba ta.” Kwo diita lon sumowu taney, kwo eeta nagwa nagwa nobok ichu. <sup>9</sup> Wowak, kwota ma kawen hehar otiitanak, wonyak, kawenmagi-irechichaney, ii kwo kapaseka otiito. Otiitawak, eeta lo maji sii eeche wocho: kwolon reekiito.

<sup>10</sup> Ma por rii lo podaten reekiiney, rii eyey lon eeta reekii hamato. <sup>11</sup> God rii eeche wor: “Nobok tawa miman anemeshherokotanakech.” Rii eeche wobar: “Ma pi sowawotanakech.” Mii akarmi-man anamesherokonan sowey, man pi sowak-woney, ii mii eeta lon reekii tawa ma. <sup>12</sup> Ma

ye lo majin sumowu tawey, eeta akar ma yenya hehar kiyataye tawak, ye eeta kepi siito. Komasa God riita eyey man diita man hogochichawa lo majik anasa takiita. Eena kwota na maji kepi bachi hehar nagwa nagwa otiitawak. <sup>13</sup> Komasa God

riita rukusiinan biish tawa man anasa nediik riipa riina rukusiikasakech. Man inyakapwa hiki rukusii tawa ma riin God riipa ba diigiichikiita.

*HIKI SIITIICHICAWA BOBOY SIITAKA YO OTII TAWA BOBOY SIITAKA PIIR CHEGIK SA EECHA OTII TA*

<sup>14</sup> Eeji yaka kumwoy, ma por rii eeche wonyey, “Ada hiki siitiichichu,” riita yo kepin otiinan siiney, riiti hiki siitiichichawa boboy sii eeta kubuchey boboy. Riiti hiki siitiichichawa boboy siipa boy riina yesokwa yichikiita? Yaho.

<sup>15</sup> Wowak, mowey yaka kumwoy ye taney, si-ivatabi dopo tawey, aboboy dopo tawey, <sup>16</sup> kwo eeche yenya wonyey, “Na kepi tanak, ruwu tanak, kepi a ta,” kwo siivatabin aboboyen hanan siiney, ii boy boboy kepin kwo otiito? <sup>17</sup> Hiki siitiichichawa boboy sii tawaga eecheba tawey, yo kepin otiinan siiney, eeta har.

<sup>18</sup> Ma por riipa kapo eeche wokiita: “Miita eeche hiki siitiichichu. Ada eeta yo otiito.” Ada eena meejichi awasen wocho: Miita yo kepin otiinan siiney, mii boyega ana mukuchichu mitahiki siitiichichawa boboy. Ada eena kwona mukuchichu: Ada yon eeche otii taweyn eena eeji hiki siitiichichawa boboyen kwona geenyik mukuchichu. <sup>19</sup> Kwo eeche hiki siitiichichu God podareba tawa. Eeta kepi! Wowak, kapasek spirit ye eecheba hechi hikitu God rii tawa. Wowak, ye akii tawak, nubu nubutu. <sup>20</sup> Kwo hikisha tawa ma! Kwo sobo hiki siitiichinyey, kwo yo kepin otiinan siiney, miiti hiki siitiichichawa boboy sii eeta kubuchey boboy. Kwo kapo gegiyato ada kwona diita boboy siiti mun mukuchik?

<sup>21</sup> Ebrahim noti apoko, riita riiti yikapwan, Aisak, opelen otiiken otiirek, God rii riina nagwa nagwa ichawa ma habar. Iliboy Ebrahim rii yo kepin otii tarek, God riita riina nagwa nagwa ma habatar. <sup>22</sup> Kwo hecho riiti hiki siitiichichar boboy siitiika yo siitiika chegiik eecha otiitar. Riita yo otii tarek, riiti hiki siitiichichawa boboy sii hehar sokwatar. <sup>23</sup> Mashi God riita keyir maji eecha wocho: “Ebrahim rii God riina hiki siitiichicharek, rii hiki siitiichichiniga otii tarek, God riita hechi riina hiki nagwa nagwa ma kepiga eecha yar. Yarek, God rii riina eecha habar: “Eeji apoma, Ebrahim.” <sup>24</sup> Wowak, kwo hecho: Ma riita yo siikenen otii tawak, eena God rii eecha habato rii nagwa nagwa ichawa ma. Hiki siitiichichawa boboy sii saniga saka kiki siikiitawak.

<sup>25</sup> Rehep, sii nobo anemeshero tawa mima sii eechaba tawa. Siita Josua riita maji heechirek ir ma kawen yeechi hehar tarek, heechirek i akar nobok ir. Eecha yo otiirek, God riita hechi siina nagwa nagwa hiki tawa maga eechaba habar. <sup>26</sup> No hikitu maba spirit biish taney, iipa hakiita. Hiki siitiichichawa boboy sii eechaba tawa. Yo otiinan biish taney, iipa eechaba hakiita.

### 3

#### *NOTA NA NOTI TAREKWOYAN HEHAR HEECHI TA*

<sup>1</sup> Eeji yaka kumwoy, opoche nokwapa nokwapa ma kwoti nediik maji pokii ma siik otiitanakech. Kwo hecho anasak tawa nedii yanak, maji pokii tawa ma nona harapa anasanak, akar Kristen

yen karakada anasabakiita. <sup>2</sup> Nota eyey tepiikeneechi sakato. Ma por rii riiti majik tepiikeneechi sakanan siiney, rii eeta ma kepi. Wonyak, riipa riiti maba omun eyey siitii kowuba takiita. <sup>3</sup> Nota hos riiti kujak ain eeka heechi tawak, eeta hos riiti eyey maba eeta man sumowutu. Ma noti hiki tawa nobon iiban sumowutu. <sup>4</sup> Kwota na jabiiren hiki ta. Eeta harapa boboy. Harapa sowa yawak, eeka ye ichu. Ichawak, riita iken hikiwa nobok iken otiwey, rii eyi neekichuwak, eeta eemek ichu. <sup>5</sup> Wowak, tarekwoy sii eechaba tawa. Sii eeta ameda maba omu. Eecha tawak, sii keena harapa maji bato. Kwota hikitu karakada hi siin kwashik tukuney, siipa harapa okoreenak eyey me ama uwu hamakiita.

<sup>6</sup> Tarekwoy sii eechaba eeta hi tawabaga eecha tawak, sii eyey maba omu nediik tawak, sii nokwapa nokwapa kapasek boboyen noti mabak otii ye itu. Sii maban eechaba otiichichawak, harapa higa eecha uwutawak, noti chishi tawa nobo harapa kapasek siito. Eeta hi uwu tawa eem mu heechi yar. <sup>7</sup> Ma ye eeta kiki sowa ye eyey kwashika tawa poye, aposhabu, apo, omu, hopu eena yeechi yaya yecha otii tawa aboga otiichuwak, ye iiban sumowubato. Apon, pak tawa boboyen, somakwotii tawa pak tawa boboyen otiichuwak, ye iiban sumowubato. <sup>8</sup> Wowak, ma por rii ma yechi tarekwoyen keena dagiir poyekasakech. Yahoo. Eechaba tarekwoy ye sokwa tawey, man kapasek maji ba ye itu. Sii eeta kapa hava tawa boboyega eecha tawa. <sup>9</sup> Noti tarekwoy, sii noti Harapa noti God riina woshi-achi notaka eecha bana bana tawa man God



riita riitabaga eecha otiiri, tarekwoy sii yenza kapasek majin bato! <sup>10</sup> God riiti hin yesokwa maji, kapasek maji, sii podat kujabak sayato. Eeji kumwoy, dii eeta kapasek. Opoche eecha otiitanakech! <sup>11</sup> Wokebi pochi sii uku kepi sokwa tawey, pu ha tawa uku sii iibak chegiik sokwakasakech! <sup>12</sup> Yaka kumwoy pek me kapo boy oliv me siiken wakiita? Yahoo. Wain pok sii pek me siiken wakasakech. Somakwotii tawa uku sii kwoya atawa ukubaga eecha otiikasakech.

### *HOKWA SOKWA BOBOY KEPI GOD RIITA HATO*

<sup>13</sup> Kapo ma por kwoti nediik tawey, rii hehar hokwa ma tawa? Ma por riita eecha taney, rii chishi tana nobo sa kepi chishi ta. Sa mayama karakada sii tanak, hokwa sokwa nobo hikichiyo kepin otiinak, diita mukuchichu rii hokwa sokwa tawa ma. <sup>14</sup> Kwoti inyaka wopuka kwotay maji, kuru maji, egesii inyaka eecha taney, kwo opoche raganiga kwotay maji, kuru maji egesii inyaka eecha taney, kwo opoche raganiga woshepii omu-tiik maji batanakech. <sup>15</sup> Diita yikadey nagwa nagwa hokwa sokwa boboy sii saka hevenek heechi saka yarek. Sii eeta diita nosapek tawa boboy. Sii eeta spirit siiti boboyekasakech. Gaba riiti boboy. <sup>16</sup> Ma ye akar man inyaka kapasek hiki taney, yecha yechi hin yesokwa taken hiki ye i taney, eeta yikadey ma ye hehar yikasakech. Ye kapasek boboyeban hikichi otiito. <sup>17</sup> Wowak, hevenen heechi ya sakar hokwa sokwa boboy sii mapo apama tawak, kwoya hiki tawa boboy. Sii ow anapikasakech. Sii eeta eshar kepi otii tawa boboy. Siita rukusiichi hehar otii tawa

boboy. Sii akar ma majin hehar meejito. Sii siik watanak, yo kepin otii takiita. Sii man otiiiniga podat inyakabak hikitu. Sii wosheipii Kristenekasakech. <sup>18</sup>Inyaka kepi hikichi otii tawa ma yechi inyaka kepi hiki tawey, yecha siiken chichawey, sii sokwa nagwa nagwa otii tawa boboyen eena wato.

## 4

### *MA POR RII DIITA NOSAPEK TAWA BOBOYEN KWOYA HECHAWAY, II EETA GOD RIITI YABU PI MA*

<sup>1</sup> Kapo diita kwo owana pichawey, ow maji-batawey, mu siitak yar? Kwoti inyaka kwotay tawa boboyen yesokwa tawa boboy sii kwoti sugu wopuk tawak, sii eeka eechaba sokwato.

<sup>2</sup> Kwota boboyen yaken gegiya tawey, kwo eena yakasakech. Eena kwo anadii man pi sowakwo-ken hikitu. Kwo boboyen kwoya hechawey, kwo yakasakech. Eena kwo ow majin ba tawak, ow ana pichu. Kwo God riina wohekasakech. Eena kwota yaken hiki tawa boboyen yakasakech.

<sup>3</sup> Wowak, kwo God riina wohechawey, kwoti inyaka kapasek tawak, kwo kwoti mabak yak otii tawa boboyen iiban, eena yakasakech. <sup>4</sup> Kwo ma miman sayi heechi tawak ichawaga eecha tawa! Ma kwo diita nosapek tawa boboyen rukusii tawey, ii kwo eeta God riina yabu pichu. Eeta ma rii eeta nosapek eecha nareboy sii tawey, rii eeta God riiti yabu pi ma. <sup>5</sup> God riita mashi keyir maji eecha wocho: “Diita spiriten God riita noti sugu wopuk heechi tari, God riita diita spiriten

yeechi siitii kowuken gegiyato.” Opoche kwo eecha hikitanakech dii sobo maji.

<sup>6</sup> Wowak, God riita riiti yeyada rukusii tawa boboyen nona hari, eeta sii eeta hapaga tawa. Mashi keyir maji eecha wocho: “God riita wohipu tawa ma yenya darema poyetu. Rii eshar tawa ma yenya rukusii tawa boboyen hatu.” <sup>7</sup> Wowak, kwota na mayama kwoti dagiir poyechi God riiti kuruk eeka na sii ta. Kwota na Gaba riina darema poyeney, eeta Gaba riita kwona heechi ikiita. <sup>8</sup> Kwota na i God riitaka bana bana sii tanak, riita eechaba ya kwotaka bana bana takiita. Kwota kapasek oti tawama kwoti tapan na uku yeetii ta! <sup>9</sup> Kwo na inyakapwa hikichi keya ta. Kwo hegii anemeshero tawey, ii na heechi na keya ta. Kwo kwoya hiki tawey, na inyakapwa hiki ta. <sup>10</sup> Kwo na mayama God riiti kuruk dagiir poye ta. Wonyak, riipa kwona yesokwa yichikiita.

### *NOTA YAKA KUMWOYEN BA DI- IMAKASAKECH*

<sup>11</sup> Eeji yaka kumwoy, kwo opoche anadii man kapasek batanakech. Eeta ma rii riiti yaka kumwoyen kapasek maji ba taney, ba diimaney rii eeta lon kapasek bachi ba diimato. Kwo lon ba diima tawey, kwo lo majin sumowukasakech. Kwo eena ba diimato. <sup>12</sup> God riitaba lon ha tawa ma, ba diima tawa ma. Riitaba saniga yesokwo tanak, dagiir poyechi pi sowakwo takiita. Kwo kapo nama kwotaka bana bana tawa man ba diimato?

### *NA OPOCHE GOD RIINA WOSOWOYETANAKECH*

<sup>13</sup> Kwota ma kaw eecha bato: “Apa, iyi nota akar harapa akamak inyak, nota sukwiya pochi siinak, ya yon otii tanak, harapa mani yan ya takiita.” <sup>14</sup> Ana na meeji: Kwo saka hechawak kapo boy mey boboy kwotak iyik yakiita? Kwo hirikaga eecha tawa. Sokwa ameda punyechi eeta ha yeyuwa. <sup>15</sup> Kwota diita maji na ba, “God riita gegiyaney, nota tanak, diita yon otii tanak, akar yo otii takiita.” <sup>16</sup> Wowak, kwota keena wohipuchi uwabatawak, kwoti hin mayama yesokwato. Ii eeta kapasek. <sup>17</sup> Kwo na hehar hiki ta. Eeta ma rii nobo kepin hiki tawey, rii eena kepi otiinan siiney, rii eeta kapasek boboyeka eecha siikiita.

## 5

### *HARAPA BOBOY SAGAKA TAWA MA MAJI*

<sup>1</sup> Ada boboy nokwapa tawa ma kwona wocho. Kwota na hiki ta! Nomoya tawa kapasek boboy kwotak yaken otii tawey, eena kwo na harapa keya ta. <sup>2</sup> Kwoti eyey boboy saga ye eeta bonyesii hamar. Kwi siivatabi machik a hamar. <sup>3</sup> Kwi gol silva sii eeta bonye siir. Eeta keha tawa boboy yecha kwona ba diimachinyak, eeta boboy sii kwota maba omu aniga hik uwunaga eecha siikiita. Apa hamak otii tawa nediik kwo nokwapa nokwapa boboy sagan yaya yopo yichikiita. <sup>4</sup> Na hehar meeji ta. Yo otii tawa wakasa ma ye kwotinowon otiiri, kwo yechi ya kawen yeechi veenyir. Eeta ya kwota yeechi veenyiri, sii uwato. Miiti nowo sagan yeechi yaya yopo yichi tawa wakasa ma yecha uwanak, eeta Harapa God rii

meejito. <sup>5</sup> Kwota diita nosapek tarek, kwo nokwapa nokwapa boboy kepin yeechichi riigiitar. Kwo atarek, kwo kokuka tar. Tarek, ii kwo mayama sayar tarek, kwona aken pi sowakwoki-ita. <sup>6</sup> Kwota nagwa nagwa tar ma kepin anaseechi pi sowakwo har. Kwo eeche otii tawey, ye kwona awasen ow ana pichi darema poyekasakech.

*KWO NA HAPAGA SIICHI SIITII GOD RIINA WOSHIA TA*

<sup>7</sup> Eeji yaka kumwoy, kwona eshar Jisas riina siitii kowu ta. Kwona he: Nowo ma rii nosapek tawa boboy saga kepin waken kowutu. Rii wayin kowutu vanak saga omu waken. <sup>8</sup> Eena na kowu ta. Harapa Ma riita yak tawa nedii bana bana tawa. Eena na kwoti inyaka wopu anabeyichi riina kowu ta!

<sup>9</sup> Yaka kumwoy kwo opoche kwoti yaka kumwoy yenya kapasek majin batanakech. Otiinan siiney, God riipa kwona saka anaseechiki-itawak. Eeta Jas riita nuburejak siitiichi yaken hikitu! <sup>10</sup> Yaka kumwoy, kwo tana hiki ta piirapet yecha mashi Harapa Ma riiti hin kwodii wo mukuchirin. Yecha hapaga siichi kapa meejiichi nomoyaniga eshar eshar otii tawa abon eena na hechi eecheba otii ta. <sup>11</sup> Na meeji yecha eshar eshar ana beyichi siitii otii tarek, eena nota yenya eeche habato ye eeta kwoya hiki tar ma. Kwo Jop riita otiir abon meejiir. Kwo meejiibar Harapa Ma rii riina boboy kepin otiichiri, rii nomoyaniga eshar eshar otiichi tar. Ayo. Nota hikitu eeta Harapa Ma rii nona rukusiichiniga hehareto.

*NO OPOCHE SABO HOWUTANAKECH*

<sup>12</sup> Yaka kumwoy, kwo mapo opoche hevenen habachi nosapen habachi akar boboyen habachi sabo howutanakech. Kwota “ayo” wonyey, eeta sowa. Kwota “biish” wonyey, sii eetaba. Eecha otiiney, God riipa saka kwona anasakiitawak.

***NAGWA NAGWA ICHAWA MA RII GOD RIINA MAJI BA TAWEY, RII HAPAKA TAWA***

<sup>13</sup> Ma por rii kwoti nediik tawey, rii kapo nomoya tawa boboyeka eecha tawey, ii rii sapa God riina wohe. Ma por rii kapo kwoya hikitu? Rii sapa God riiti hin yesokwa tawa hokwan chi cha. <sup>14</sup> Kwoti nediik ma por rii kapo haken otiito? Rii sapa yopo yichawak siitii kowu tawa man wonyak, ye riina God riina maji wohenyak, Harapa riiti hik riiti maban kwarek eecha gwotiikiita. <sup>15</sup> Yecha God riina hiki siitiichi wohenyak, riipa riina otii kepi siichi yesokwa yichikiita. Riita otiitar kapasek yon God riita kwoyava yeechikiita. <sup>16</sup> Eena kwo na kwota otiir kapasek boboyen yaka kumwoyen geenyik kwodii wo mukuchi cha. Wonyak, kwotana awasen awasen na God riina maji bachicha. Wonyak, kwopa eeka kepi siikiita. Nagwa nagwa otii tawa ma rii God riina wohenyak, God riita meejichi man hehar kiyatayechichu. <sup>17</sup> Ilaija rii nota tawabaga tar ma. Wayi vanan siik eena riita God riina hehar wohe siitiichir. Sukwiya piiriichar niiwiika 6 eecha siirek, wayi vakasakech. <sup>18</sup> Siirek, rii kawka wohererek, neer sii wayi heechirek, ya sakarek, boboy saga eeta kawka sokwa henyir.

***MAN HEHAR TAWA MAJI***

<sup>19</sup> Eeji yaka kumwoy, na meeji. Ma por rii nagwa nagwa nobon heechi inyey, akar ma rii riina yeechi nobo kepin kawka mukuchinyak, <sup>20</sup> na hiki ta, rii eeta boboy kepi otiir. Ma por rii kapasek boboy otii tawa ma poren kiyatayechinak, rii kapasek boboy magiirechinyey, rii eeta kapasek otii tawa ma riiti meseken yesokwa yichitu. Rii ha eem sakapa ikiitawak. Wonyey, eeta yikadey nobo God riipa nokwapa nokwapa kapasek boboyen kwoyava yeechikiita.

**GOD RIITI MAJI KEPI**  
**The New Testament in the Washkuk Language, also**  
**known as the Kwoma Language, of Papua New Guinea**  
**Nupela Testamen long tokples Washkuk long Niugini**  
copyright © 1974 Wycliffe Bible Translators, Inc.

Language: Washkuk (Kwoma)

Dialect: Kwoma or Washkuk

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-08

---

PDF generated using Haiola and XeLaTeX on 3 Mar 2023 from source files dated 9 Oct 2020

df8dc48f-feff-515c-a5a2-c9c957dac5bb